

Paur kute Garaxakam me jamã pi'ôk no'ôk ne ja.

Paur ne pykabê Garaxakam me jamã pi'ôk no'ôk ne. Nãm arým pyka kunĩ'yr mrãnhkôt me'yr bôx ne memã Jeju jarê nhym me kwý arým tu amim markumrêx ne 'ã abeno akprô. Nhym kam Paur arým mã me jadjwý'yr tẽ nhym tekrekam mebê idjaer kwý me'yr bôx ne memã kum,

—Djãm ar aje tu amim Jeju markambit Metĩndjwýnh kute ar apytâr? Kati, dja gar prĩne Mõjdjê kukràdjàdjwý kôt ar amijo aban kam arým Metĩndjwýnhmã amex, ane.

Nhym kam Paur memã kum,

—Arkati. Mrãmri ne me tu amim Jeju markumrêx nhym Metĩndjwýnh arým memã axwe kêt jarê nhym me arým kum mex. Me ta ne me mýjja kukràdjákôt amijo bakôt Metĩndjwýnhmã mex kêt. Mrãmri ne me tu amim markumrêx nhym Metĩndjwýnh ukapríkôt arým memã axwe kêt jarê, ane.

Djã nãm ã Abraão Mõjdjê kukràdjákôt amijo bao ane nhym Metĩndjwýnh arým kum axwe kêt jarê? Kati, nãm tu Metĩndjwýnh markumrêx ne arým Metĩndjwýnhmã mex. Nhym amũ tũmrãm Mõjdjê katon memã kukràdjà jarê. Bir be, gwaj badjwý tu amim Jeju markumrêx ne arým kênhkam ar baba. Gwaj bajaxwe kute gwaj bate djê pyræk ne gwaj babê Metĩndjwýnh kurê. Nhym Metĩndjwýnh arým bajaxwebê bapytà. Arým ne gwaj bate djê apêx. Mýkam dja gwaj akubyn Mõjdjê kukràdjà

tũmo amite djê ar o baba? Kati, Jeju kute gwaj bajãpre bõnhkam gwaj kênhkam ar babakam gwaj Jeju kukràdjà ny kõt amijo baba rà'ã. Nãm ã Paur memã anen ajte memã Jeju kute anor kõt memã amijarê. Tãm ne ja.

¹ Ba ne ba ibê Paur. Djãm pykakam me'õ kajgo ne ijano? Nâr, djãm Metĩndjwýnh ne me'õ kajgomã ijã karõ nhym ijano? Kati. Jeju Kritumê Bãmbê Metĩndjwýnh ijano ba arkum idjàpênh iba. Jeju Kritu arým ty nhym Bãm akubyn o tĩn ne.

² Jeju kukwakam bakamydjwý ikõt dja bar wãm ar amã ikabên mex jarê. Pi'ók no'òkkam ar amã arê. Pykabê Garaxakam apýnh ar aje amim Jeju mar ne kõt ar aben pydjio aba djàri ne ba ar amã ikabên mex jarê.

³ Metĩndjwýnhbê ne me Babãm. Ne Bẽnjadjwýr djwýnhbê ne Jeju Kritu. Gê ar tu kum ar akaprĩn* ar ajo ba gar adjumar mex rà'ã ne.

⁴ Jeju Kritu ne gwaj bakadjy amingã. Nãm gwaj bajaxwe pãnh ty. Me kum Metĩndjwýnh kĩnh kêtja ne me axwe:. Mekõt bajaxwe kêt kadjy gwaj bapãnh ty. Kute kubê gwaj bapytâr kadjy gwaj bapãnh ty. Me Babãmbê Metĩndjwýnh kute kum 'ã karõ kõt ne gwaj bapãnh ty.

⁵ Metĩndjwýnh ne ra:x ne uma:. Gê me aben djô'ã memã Metĩndjwýnh rax jarênh rà'ã: rà'ã ne. Mrãmri, tãm ne ja.

*Me memã Kritu kupa'ã ujarênh nhym mebê uma.
Mat 7.15; Ep 4.14; Kor 2.8; A Ped 2.1*

* **1:3** Djãm ar ga ne gar adjukaprĩ nhym ar pãnh arým kum ar akaprĩ Kati. Ar ta ne ar tu kum ar akaprĩkumrêx.

⁶ E kum, djãm ar ga ne gar ajaxwe kêt nhym Metĩndjwỳnh pãnh kum ar akaprĩn amiwỳr ar ajuw ne ar ajo ba? Kati. Ar ga ne gar ajaxwe: nhym ta kum ar akaprĩ. Kritu ar ajaxwe pãnh ty nhym kam Metĩndjwỳnh ta kum ar akaprĩn amiwỳr ar ajuw ne ar ajo ba. Nhym kam wãnh me kwỳ ar awỳr bôx ne arỳm 'êx ne ar amã we Kritu'ã ujarẽnh ny 'ôdjwỳ jarẽ. Me wãnh ar amã arẽ gar arỳm ijaêrbê me'yr amijo akêx ne mekôt amijo abao dja.

⁷ I:je. Djãm mrãmri ne me ar amã Kritu'ã ujarẽnh ny jarẽ? Kati. Nãm me arĩk ar anoo biknoro ba. Kritu kupa'ã ne me ar amã arẽnh ba.

⁸ Arỳm ne bar kàj bê ar amã arẽ, katàt Kritu'ã ujarẽnh nykumrêx jarẽ gar arỳm amim ama. Nhym be, godja ar ijõ akubyn ar awỳr bôx ne ar amã Kritu kupa'ã ajte ujarẽnh ny 'ôdjwỳ jarẽnh jabej gê Metĩndjwỳnh on pãnh o akno gê biknor rã'ã rã'ã ne. Nàr, godja kàjkwakam kadjy mrãnh djwỳnh 'õ ar awỳr bôx ne ar amã kupa'ã ujarẽnh ny 'ôdjwỳ jarẽnh jabej gê Metĩndjwỳnh on pãnh o akno gê biknor rã'ã: rã'ã ne.

⁹ Bar ajte jakam ar amã arẽ gar ama. Arỳm ne bar katàt ar amã Kritu'ã ujarẽnh nykumrêx jarẽ gar amim ama. Nhym be, godja me'õ ar awỳr bôx ne ar amã Kritu kupa'ã ajte ujarẽnh ny 'ôdjwỳ jarẽnh jabej gê Metĩndjwỳnh on pãnh o akno gê biknor rã'ã: rã'ã ne.

¹⁰ Djãm me kum ikĩnhmã ne ba abej ar iba? Kati. Metĩndjwỳnh kum ikĩnh ne ba abej. Djãm ije meo kĩnh prãm got? Kati. Ne ba ren meo kĩnh prãm ba ren ibê Metĩndjwỳnh nhõ àpênhkumrêx kêt.

Jeju ta ne Paurmã amijarẽ.

A Kô 1.12; Tex k 2.4

¹¹ Akmere, àpnhĩre ar, ba ar amã arẽ. Ije kàj bê ar amã Kritu'ã ujarẽnh ny jarẽnhja djãm me'õ ta ne amim ujarẽnh'ã karõn imã arẽ? Kati.

¹² Djãm me kute aben djô'ã ujarẽnh ar baja ne me'õ imã arẽ ba o iba? Kati. Nàr, djãm me'õ kute prĩne ujarẽnh marja ne imã arẽ ba kuma? Kati. Jeju Kritu ta ne imã ujarẽnh ny jarẽ ba maro iba. Tãm ne ba jakam pi'ókkam wãm pykabê Garaxakam ar amã arẽ.

¹³ Arým ne me ar amã ijã ajarẽ gar ama. Amrêbê ne ba mebê idjaer kukràdjà kôt ar amijo iban Metĩndjwýnh nhõ me ja kute amim Jeju maro ibikẽnh kumex. Ne kam me kute amim Jeju mar kêt kadjy mebê Jeju kurên abenbê me ngrãnho iba.

¹⁴ Ne mebê idjaermẽ ro'ã ijabatãnhja ije me kukràdjà maro me akrenh mexo tẽ. Ne me ikukãmãre kukràdjà tũm'ã ino tỳ:x ne o iba.

¹⁵ Nhym kam Metĩndjwýnh ta arým kum ikĩnh ne kum ikaprĩ. Djãm ba ne ba imã kĩnh nhym kum ikaprĩ? Kati. Ta ne tu kum ikaprĩn arým amiwýr ijuw ne ijo ba. Adjàkamã inã tikkrekam ijêtri ne Metĩndjwýnh amijo ipytà.

¹⁶ Ije kàj bê me bajtemmã 'ã idjujarẽnh kadjy arým imã Krao amirĩt. Kute imã Krao amirĩtkam djã nã bãm o me'õ kumrẽx ma nhym arým imã arẽ ba ô'ã memã arẽnho iba? Kati. Kritu ta ne imã arẽ.

¹⁷ Nàr, djã ne ba krĩraxbê Djeruxarẽ kumrẽxmã tẽn bõx? Nãm Jeju ar ja kumrẽx janon kam badjwý ijano ba kum idjãpênh ar iba. Djã nã bãm Jeju kute ar anor ja kumrẽx'ýr Djeruxarẽmã tẽn bõx nhym ar imã kabên'õ jarẽ ba memã arẽnho iba?

Kati. Ar'ÿr Djeruxarêkam itêm kêt. Ate ne ba pykabê Arabijkam tẽ. Ba kam ajte akubyn krĩraxbê Tamagumã akêx. Kritu ta ne imã kabên jarê ba memã arêngo iba. Tãm ne ba jakam pi'ôkkam wãm pykabê Garaxakam ar amã arê.

¹⁸ Nhyam kam ijã amex amãnhkrut ne ikjêkêt apêx. Kambit ne ba arÿm Djeruxarê'ÿr tẽ. Ije Pedru pumũnhmã 'ÿr tẽ. Ne kam Pedru'ÿr bôx ne ar iro'ã nhÿ. Ar iro'ã nhÿ: nhyam ar ijã akatibê 15bit apêx ne. Djã ne ba kam idjãm 'iry got Pedru imã me kabên 'õ jarê ba memã arêngo iba? Kati.

¹⁹ Djã ne ba kam Jeju kute ar anorja 'odjwÿ pumũ? Kati. Ije ar 'õ pumũnh kêt. Bẽnjadjwÿr djwÿnh kamy axikôt katorja ne kubê Xijagu. Xi-jagubit ne ba omũ.

²⁰ Djã nã bãm ar amã ijêx? Kati. Metĩndjwÿnh kute imarkam ne ba mrãmri ar amã ikabênkumrêx.

²¹ Ne kam Djeruxarê kurũm ikaton tẽ. Tẽ:n kajônhkôt pykabê Xirijmê Xirxij'ÿr tẽ. Tẽ:n kam arÿm kam bôx.

²² Nhyam Djeruxarê bu'ã pykabê Djudêjakam apÿnh me kute amim Jeju mar ne kôt ar aben pydjio ba djari me kute ipumũnh kêt rã'ã.

²³ Nhyam be, me kwÿ ne me amũ memã ijarên memã kum,

—Paur kute me bajo bikêngo ba ja ne arÿm jakam kàj bê Kritu'ã memã ujarênh ar ba. Me kute Kritu kôt amijo bamã memã 'ã ujarênh ar ba. Me kute Kritu mar kêt kadjy ne Paur amrêbê mebê Kritu kurêo ba. Ne jakam arÿm 'ã memã ujarênh ar ba. Nãm me ã ijarêngo ane.

²⁴ Nhyam me arÿm jabit man ikam Metĩndjwÿnhmã mextire jarêngo kumex. Be, djãm

kam ne me'õ ikabën'ã imã karõ ba memã arënhõ
iba? Kati. Kritubit ne imã arë ba arým pi'õkkam
wãm pykabê Garaxakam ar amã arë.

2

*Pedru ar kute Paur kabën'ã aben mar.
Kar 15.4*

¹ Nã bãm ar iba: nhym kam ijã amexbê 14 apêx.
Ba kam Banabekôt Djeruxarëmã tẽ. Xitudjwý ne
ba o tẽ.

² Metĩndjwýnh ta ne imã 'ã karõ ba kabën kôt
'ýr tẽ. 'Ýr tẽ:n kam arým 'ýr bõx. Ne kam me
krãptĩ kàxã me rũnh kumrëxmẽ ro'ã akuprõ. Me
kute amim Jeju mar rũnhmẽ ro'ã akuprõ. Memãbit
ar rũnh pyrãkjamẽ ro'ã akuprõ. Ne kam memã
arë. Ije me bajtemmã Kritu'ã idjujarënh nyjarënhõ
ibaja ne ba memã arë. Ne ba ren Djeruxarëkam me
krãptĩ kumrëxmã arën ren kam te memã arë nhym
ren me kute imar kêt ne. Nhym be, kati. Me krãptĩ
kàxã ne ba me rũnh kumrëxmã arë.

³⁻⁴ Nhym Xitubê me bajtembê kreguja ikôt dja.
Me ja ne me kute Môj djê kukràdjà kôt amijo ba kêt
ne my nhinhu kà tã. Nãm Xitu ikôt dja. Nhym
me ta kute amijo 'êx ne kute amijo Jeju mar mexja
ne me arým apdjun mekôt wadjà. Bar Kritu Jeju
kabën kôt idjumar mex ne ar ibamã nhym me
amim,

—Paur ar kute Môj djê kukràdjà kôt amijo ba
katàt jabej ba ar omũ. Gêdja ar kôt amijo ba kêt ba
me kukràdjà'ã arkum apnê, ane. Ga, me ta te: kute
Môj djê kukràdjà kôt amijo ba mexja pumũ. Ne te:
Metĩndjwýnhmã amijo mexo ban umar punu. Ar
idjumar punu ja kadjy ne me ã amim ar ijã ane. Ne

kam te: kute Xitu my kà krã'yrmã memã 'ã apnê. Djã ne me kute amim Jeju markam me rûnh ja ne mekôt kabên dji? Kati. Me mekôt kabên djir kêt ne kute,

—Gê ar Môjdjê kukràdjã kôt amijo tèn on Xitumã my kà ta, anhÿr kêtumrêx.

⁵ Djãm ar ba ne bar me ta kute amijo Jeju mar mexja kabên kôt Xitu my kà krãta? Kati. Bar me kabên kôt Môjdjê kukràdjã kôt amijo itêm kêtumrêx. Mÿkam? Bir, ne ba ren ar mekôt amijo tèn my kà krãta gar ren ikôt Môjdjê kukràdjã maro aban kôt ar amijo aba. Ne kam ren arÿm Kritu kabên katàt mar kêt ne kôt amijo aba kêt. Amrêbê ne bar ar amã katàt Kritu'ã ujarênh ny jarê gar kôt ar amijo aba. Kôt amijo aba rã'ã kadjy ne bar me ja kôt amijo iba kêtumrêx.

⁶ Nhym be, memãbit ar kute rûnh pyræk ja, me kute ar'ã abenmã kum,

—Amrêbê ne ar gwaj bamã wan gwaj bajo ba. Gwaj bamã ne ar raxkumrêx, anhÿrja. Djãm me kute ar rûnh'ã abenmã anhÿrkam djãm imã ar uma? Kati. Memãbit ne ar kute rûnh pyræk. Nhym be, Metĩndjwÿnhmã ne ar ngri:ren kajgo. Bir be, Kritu ne imã kabên jarê. Djãm ijukri ne ar rûnh imã mÿjja 'ødjwÿ jarê ba kam memã arênh oiba? Kati. Ar kute ijukri imã mÿjja'õ jarênh kêtumrêx.

⁷ Ne kam ar ipa krij ne ar itatakbit. Arÿm ne ar kute imar ne ar abenmã kum,

—Be, mrãmri ne Metĩndjwÿnh Paurmã kum, “Ga dja ga me bajtemmã Kritu'ã ujarênh ny jarê”, anhÿrkumrêx. Nãm ar ã abenmã ane.

⁸ Metĩndjwÿnh ne mebê idjaermã Pedru jano nhym arÿm memã Kritu'ã ajarê. Ga, me

kräpti: arým kute tu amim markumrëxja pumũ. Metĩndjwýnh ajte badjwý ijano ba me bajtemmã 'ã ajarê. Ga, me jadjwý Kräpti tu kute amim markumrëxja pumũ.

⁹ Xijagumẽ Pedrubê Xepamẽ Djuãomẽ ne ar kumrëx tũm. Ar memãbit rũnh. Ar ja ne ar amim,

—Mrãmri ne Metĩndjwýnh ta kum Paur kapri:kumrëx nhym mrãmri arým kôt kum àpênhkumrëx, ane. Nãm ar anen arým Banabemẽ bamẽ ar ipa krij ne ar itatak ne ar imã,

—Mrãmri ar ga dja gar me bajtem'yr mrãn memã 'ã ajarê. Nhym be, ar ba dja bar mebê idjaer'yr mrãn memã 'ã ajarê, ane.

¹⁰ Ne kam ar imã,

—Dja gar ar ikam me õ mýjja kêt mar rã'ã, ane. Jabit ne ar ar imã arê. Ba kam arým ar kuman amũ memã me arênhõ iba nhym me arým memã mýjjao atomo ba. Nã bãm ã Djeruxarëkam me maro anen arým pi'ôkkam wãm pykabê Garaxakam ar amã arê.

Paur Pedrumã kabên ne.

¹¹ Bar kam krĩraxbê ãxikimã tẽn bõx ne kam dja. Nhym kam Pedru nĩnh tẽn kam ãxikikam ar iwýr bõx. Ba kam arým kuka kõnh kum ikabên ne. Arým Metĩndjwýnh kabên kupa'ã kute amijo tẽmkam ne ba kum ikabên ne.

¹² Mýkam? Bir, amrêbê ne Pedru tu me bajtemmẽ ro'ã àkuro krĩ. Ar ba ne bar me bajtemmẽ ro'ã idjàkuro nhý nhym Pedru mekmẽ ro'ã àkuro nhý. Nhym kam me kwý Mõjdjê kukràdjà'ã no tỳxja arým bõx. Xijagu kurũm ne me bõx. Me ja ne me memã kum,

—Dja me me bajtemmẽ ro'ã àkuro krĩn arým Mòjdjê kukràdjà kupa'ã amijo tẽ. Nãm me ã memã anhỹro ba. Me ja bõx nhym Pedru arým me omũ. Ne kam arým me bajtemmẽ ro'ã õ kwý krẽn krãtan arým ate nhỹ. Me Mòjdjê kukràdjà'ã no tỳxja, me my kà rênhneja, kute 'ã kum kabẽn karõ ne Pedru ate nhỹ. Me ja kute kum,

—Kwãrĩk wãnh me bajtemmẽ ro'ã adjàkur kêt. Abê mebê idjaer. Mòjdjê ne me bamã, “Kwãrĩk wãnh me bajtemmẽ ro'ã adjàkur kêt”, ane ga kam me ro'ã adjàkuro akrĩ, anhỹr karõ ne Pedru ate nhỹ.

¹³ Nhym kam ar ikam mebê idjaer kunĩ Pedru kôt amijo mõn ate ar ibê nhỹ. Nhym kam Banabed-jwý arým rerekre ne me umaje kôt amijo tẽn ate me bajtembê amijo tẽn ate ar ibê nhỹ.

¹⁴ Ba kam me omũ. Kritu'ã ujarẽnh ny ne katàtkumrẽx nhym me arým kupa'ã amijo mõ ba arým me omũn arým Pedrumã ikabẽn ne. Me kunĩ nhipôkri ne ba 'ã kum ikabẽn ne kum,

—E kum, ga ne ga arým me bajtem kôt ar amijo aban ajte. Ga arým mebê idjaer kukràdjàbê amijo akẽx ne arým me bajtem kôt ar amijo aba. Mýkam ne ga arým jakam ajte mebê idjaer kukràdjà kôt me kute amijo ba'ã me bajtemmã karõo dja? Nã bãm ã Pedrumã ikabẽno ane.

¹⁵ Ne kam ajte Pedru arkum,

—Mrãmri me bakukãmãkjê kôt ne gu me babê idjaerkumrẽx. Me baje me bajtem'ã abenmã kum, “Me axwe”, anhỹro baba. Djãm me baje me wã kôt amijo baba got? Arkati. Me ba ne gu me babê idjaerkumrẽx.

¹⁶ Djãm kam me kute Mòjdjê kukràdjà kòt amijo bakam ne me mrãmri axwe kêt? Kati. Me kute kukràdjà kòt amijo baja ne me te axwe kêt prãmje. Nhym be, me tu kute amim Jeju Kritu markumrêx. Nhym kambit arým memã axwe kêt jarê nhym me kum axwe kêt. Tãm ne gwaj amrêbê kuma. Me bajtemja ne me tu amim Kritu markumrêx. Gwaj badjwý ne gwaj bajaxwe kêt kadjy tu amim Kritu Jeju markumrêx. Djãm gwaj bajaxwe kêt kadjy ne gwaj baje Mòjdjê kukràdjà marn kòt ar amijo baba? Kati. Kadjy ne gwaj tu amim Kritu markumrêx. Djãm pykakam me'õ ta axwe kêt prãm? Arkati. Me'õ ta kute Mòjdjê kukràdjà marn kute kòt amijo bakam te: axwe kêt prãmje. Nã bãm ã Pedru arkum ane.

¹⁷ Ne kam ajte arkum,

—Me'õ ta ne te axwe kêt prãmje. Nhym be, dja gwaj tu amim Kritu markumrêx ne arým bajaxwe kêt. Ne kam amim Kritu maro tẽ nhym arým gwaj bamã bajaxweo amirĩto tẽ gwaj arým amima. Gwaj baje amimarkam djãm gwaj baje me kwý kudjwa amim, “Ije amim Kritu kabên markòt ne ba ijaxwe”, anhÿr mã? Arkati. Kritu kute me axwe'ã memã àpnênh kêt. Kabênkòt me'õ axwe prãm kêtumrêx.

¹⁸ Be, amrêbê ne gwaj te: Mòjdjê kukràdjà kòt bajaxwe kêt prãmje bajaxwe rã'ã ne. Nhym be, jakam ba arým kubê amijo akêx. Kubê ije amijo akêxkam ba ren ar akudjwa ren akubyn Mòjdjê kukràdjà'ÿr amijo akêx ne ren amim,

—Ba Mòjdjê kukràdjà man kòt ar amijo iban arým ijaxwe kêt, anhÿro iba. Djãm kam ba ren mrãmri ijaxwe kêt? Arkati. Akubyn ije 'ÿr amijo

akẽxkam ba ren arým Metĩndjwýnh kabẽn mar kêt ne kam ren kam amikrà ar o iba.

¹⁹ Amrêbê ne ba amim,

—Ba Môjdjê kukràdjà man kôt ar amijo iban arým ijaxwe kêt, anhýro iba. Djãm kam mrãmri ijaxwe kêt? Kati. Ijaxwe rá'ã. Ne kam arým Môjdjê kukràdjà ma. Amrêbê ne Môjdjê memã kum, “Dja me axwe arým pãnh ty”, ane. Tãm ne ba kuman kam ijaxwe man kam arým amim,

—Kati. Dja ba Môjdjê kukràdjà man kôt ar amijo iban te ijaxwe kêt prãmje, ane. Kam ne ba arým Môjdjê kukràdjà kôt ar amijo iba kêt. Ga, me arým tykkam kute kôt amijo ba kêtja pumũ. Badjwý ije me tyk pyræk. Ne kam arým Metĩndjwýnh kadjy itĩn ne ar iba.

²⁰ Ba ne ba Kritumẽ ro'ã pĩte'ykam ty. Ne kam ba itĩn ne ar iba kêt. Kritu ta ne ikam tĩn ne ar ba. Nã bãm ã amimaro ane. Ne kam inhĩ jakam itĩn ne ar iba jakam ne ba tu amim Metĩndjwýnh kra markumrêx ar o iba. Ta ne kum ijabên ijaxwe pãnh ty.

²¹ Nãm Kritu ã kum ikaprĩ o ane. Djã nã bãm kubê ate ikrãn Môjdjê kukràdjàbit mar 'ãno dja? Djã nã bãm ijaxwe kêt mã kukràdjàbit man o Kritubê aptà? Kati. Ne ren me Môjdjê kukràdjà kôt ren axwe kêt nhym ren kam Kritu me axwe pãnh tykja ren kajgokumrêx. Nhym be, kati. Kritu kôtbit ne me axwe kêt. Nã bãm ã Pedru arkum anen ajte pi'òkkam wãm pykabê Garaxakam ar amã arê.

3

Me ta kute amijo mex kêt.

Ep 2.8; Pir 3.9; A Xim 1.9; Xit 3.5

¹ Ar abê Garaxa ar, ar ano rere:kre. Mÿj me'õ ne ar amã 'êx ne ar anoo akno? Ë, Metĩndjwÿnh kabên katàtkumrêx. Kabên kôt ar aje amijo aba kêt kadjy ne me ar anoo akno. Arÿm ne ba prĩne ar amã Kritu pĩte'y'ã jêt'ã ajarê gar prĩne ama. Nhyam kam me ar anoo akno. Ar ano rere:kre.

² Dja gar ar imã arê ba kuma. Djã nã gãm ar Môjdjê kukràdjà man kôt ar amijo aban kôt we ajaxwe kêt? Djã nã gãm we ar ajaxwe kêt nhyam Metĩndjwÿnh Karõ arÿm ar awÿr bôx ne ar ajo ba? Dja gar imã arê ba kuma. Kati. Nã gãm ar Kritu'ã idjujarênh man tu amim Kritu markumrêx nhyam Karõ arÿm ar awÿr bôx.

³ Nã gãm ar Metĩndjwÿnh Karõkôt amijo abamo krax. Djã nã gãm jakam Môjdjê kukràdjà man kôt ar amijo aban aje kôt ga: we amijo amexmã.

⁴ Amrêbê ar aje Kritu mar'ã ne me ar ajo bikêho ba gar arÿm kadjy atokry kumex ma. Godja gar jakam kubê amijo akêx ne 'ã adjukanga jabej nhyam arÿm kadjy ar atokry ja arÿm kajgo. Nhyam be, kati. Ar aje mrãmri tu amim Kritu markumrêx rã'ã jabej arÿm atokryja kajgo kêt.

⁵ Djã nã gãm ar Môjdjê kukràdjà man kôt ar amijo aban kôt we ajaxwe kêt nhyam kam Metĩndjwÿnh arÿm ar amã Karõ jano nhyam kam ar akam mÿjja pumũnh kêt nhipêx, ar akam apÿnh me punuo mex? Kati. Nã gãm ar Kritu'ã idjujarênh man tu amim markumrêx nhyam arÿm kôt ar amã Karõ jano nhyam kam arÿm ar akam apÿnh mÿjja pumũnh kêt nhipêx.

⁶ Me bakukãmãre Abraãodjwÿ ne
 “tu amim Metĩndjwÿnh markumrêx nhyam arÿm tu
 kum axwe kêt jarê.”

⁷ Kam, me kute tu amim Kritu markumrêx, me ja kunĩ kute mrãmri ne Abraão tàmdjwỳ pyràk. Tãm dja gar ama.

⁸ Amrêbê: ne Metĩndjwỳnh amim,

“Dja me bajtem tu amim Kritu markumrêx ba kam tu memã axwe kêt jarê nhym me arỳm axwe kêt.”

Nãm ã amim anen kam kàj bê Abraãomã tãm jarê. Nhym me arỳm 'ã pi'òk no'òk ne. Mrãmri ne me kute tu amim Kritu markumrêx nhym kute tu memã axwe kêt jarênh. Ja 'ã ne Abraãomã kum,

“Ga tu amim ikamnhĩxkumrêx. Ba kam arỳm imã akapri. Dja atàmdjwỳ akôt tu amim imarkumrêx. Ba kam arỳm imã me kapri. Dja apỳnh me ba djàkam me bajtemdjwỳ akôt tu amim imarkumrêx. Ba kam arỳm imã me adjwỳnhdjwỳ kapri”, ane.

⁹ Ga, me kute tu amim Kritu markumrêxja Metĩndjwỳnh arỳm kum me kaprija pumũ. Abraão tu amim kamnhĩxkumrêx nhym me kute kôt tu amim markumrêxja Metĩndjwỳnh arỳm kum me kapri.

¹⁰ Be, me kute amim,

—Dja ba Mòjdjê kukràdjà man kôt ar amijo iban arỳm ijaxwe kêt, anhỹro baja. Me ja kunĩ'ã ne Metĩndjwỳnh arỳm amim,

—Me wã dja ba me kanga nhym me arỳm me biknor tokry djàkam akuno, ane. Mỳkam dja me kanga? Bir, amrêbê Metĩndjwỳnh me bakukãmãremã kum,

“Ga, Mòjdjê kukràdjà'ã pi'òk no'òkja pumũ. Godja me mar kêt ne katàt kunĩ:kôt amijo ba kêt

jabej ba dja ba pãnh me kanga nhym me arým me biknor tokry djakam akuno.”

Nãm Metĩndjwýnh ã me bakukãmãremã ane. Me bit kute kukràdjà kunĩkôt amijo baja, djãm kôt me axwe kêtMã? Kati. Nãm me te kute kukràdjà kunĩkôt amijo ba ne kam axwe rã'ã. Kam Metĩndjwýnh ta kabẽnkôt dja me ja kunĩ akuno.

¹¹ Nhym kam me ajte me bakukãmãremã kum,

“Metĩndjwýnh kute memã axwe kêt jarẽnh nhym me arým kum mexja dja me tu amikajmã'ã markumrẽx ne arým tĩn ne ar ba”, ane.

Ga, Metĩndjwýnh kute memã axwe kêt jarẽnhja pumũ. Me kute tu amim markumrẽx kambit ne kute memã axwe kêt jarẽnh. Kam me kute Mõjdjê kukràdjà marn kôt amijo baja te: axwe kêt prãmje.

¹² Nhym kam ajte pi'òkkam memã kum,

“Me kute Mõjdjê kukràdjà marn kôt amijo baja gê me prĩne kunĩkôt amijo ba mex”, ane.

Djãm pi'òkkam kabẽn jakam ne memã, me kute tu amim Metĩndjwýnh markumrẽx jarẽ? Kati. Kute arẽnh kêtumrẽx. Nãm memã, kôt me kute amijo babit jarẽ.

¹³ Nhym be, Metĩndjwýnh ne memã Kritu jarẽ. Kritu arým pĩte'y'ã gwaj bajaxweo pãnh. Amrẽbê ne Metĩndjwýnh memã kum,

—Godja me Mõjdjê kukràdjà mar kêt ne katàt kukràdjà kunĩ: kôt amijo ba kêt, ba dja ba pãnh me kanga nhym me arým me biknor tokry djakam akuno, ane. Tãm ne Metĩndjwýnh amrẽbê arẽ. Kam gwaj ba ne gwaj kôt amijo baba kêt ne bajaxwe:. Ga, gwaj bajaxwe pãnh Metĩndjwýnh bit kute gwaj bakangaja pumũ.

Nhym be, kati. Jakam Kritu arým gwaj bajaxweo pãnh. Gwaj bakadjy ne Kritu ta mãn axwe djwýnh pyræk ne píte'ykam wajêt. Nhym kam Metĩndjwýnh arým kute kanga pyræk nhym me biknor tokry djækam biknor pyræk. Nãm ã anen píte'ykam wajêt ne arým gwaj bajaxweo pãnh. Amrêbê: ne Môjdjê me bakukãmãremã kum, “Me pĩã me anhô nhym me arij. Nhym kam Metĩndjwýnh arým me kanga nhym me arým me biknor tokry djækam akuno”, ane. Ga, Kritu píte'ykam jêtkam Metĩndjwýnh kute kanga pyrækja pumũ.

¹⁴ Kam, Jeju Kritu arým gwaj bajaxweo pãnh. Nhym kam Metĩndjwýnh arým me bajtemo djuw mex ne arým memã axwe kêt jarê. Tãm ne Abraãomã arê. Gwaj tu amim Kritu markumrêx, nhym Metĩndjwýnh Karõ arým gwaj bawýr bõx. Amrêbê kute gwaj bamã Karõ jarênhja arým gwaj bawýr bõx. Ja kadjy ne Kritu gwaj bajaxweo pãnh.

Metĩndjwýnh ne Abraãomã kabên pýnh ne arê.

Idja 6.13

¹⁵ Akmere, àpnhĩre ar, ba ar amã pykakam me kukràdjà'õ jarê gar ama. Godja me'õ ar tu abenmã mýjja'õ jarênhkumrêx. Nhym me rũnh arým 'ã pi'òk no'òkkumrêx. Djãm kam ajte me'õ kute ijukri kabên 'õ jarênhmã? Nàr, djãm kam kute kabên 'õo bingrànhmã? Arkati. Arým ne me tu 'ã pi'òk no'òk mãmджи.

¹⁶ Abraãomã ne Metĩndjwýnh apýnh mýjja jarên kam kum kabên pýnh ne arên kum,

–Dja ba ajo djuw mex ne atàmджwýo djuw mex, ane. Djãm kute kabên jao bingrànhmã? Kati. Djãm

tàmdjwỳ krãptĩ'ã ne kum, “Dja ba atàm djwò djuw mex”, ane? Kati. Tàm djwỳ pydji'ã ne kum arẽ. Tàm djwỳ ja ne kubê Kritu.

17 Metĩndjwỳnh ne amrêbê: tu Abraãomã tàm djwỳbê Krituja jarẽnhkumrêx. Nhy m kam tũ:mràm, arỳm kute kum arẽnh'ã amexbê 430 apêxkam Môjdjê mã kukràdjà jarẽ. Djã ne kute Môjdjê mã me kukràdjà jarẽho kabên tũm japa? Djã ne kute amrêbê: Abraãomã tàm djwỳbê Kritu jarẽnhja arỳm arẽnh kajgo? Arkati. Kute amrêbê: Abraãomã arẽnh kute mar tỳx rã'ã ne.

18 Djã ne me kute Môjdjê kukràdjà marn kôt amijo bakam axwe kêt ne ajte kute amim Kritu markam axwe kêt? Kati. Nhy m be, arỳm ne Metĩndjwỳnh mrãmri tu Abraãomã tàm djwỳ Kritu jarẽnhkumrêx nhy m amim tu markumrêx nhy m arỳm kum axwe kêt jarẽ.

19-20 Nhy m be, mỳj kadjy ne Metĩndjwỳnh Môjdjê mã kukràdjà jarẽ? Bir, me kute amijaxwe mar ne kute kôt amim kator kadjy. Ja kadjy ne Môjdjê mã kukràdjà jarẽ. Me aben djô'ã abenmã arẽho mō:. Abenmã arẽho mōr tãmtã arỳm tũmràm Abraão tàm djwỳ Kritu'yr o bôx. Me bakamingrãnyrekam Kritu arỳm katon ar ba. Nhy m kam me tu amim markumrêx nhy m Metĩndjwỳnh arỳm memã axwe kêt jarẽ. Metĩndjwỳnh ne Môjdjê mã kukràdjà jarẽ. Kadjy mrãnh djwỳnh kumrêxmã ne arẽ nhy m arỳm amũ Môjdjê mã arẽ nhy m amũ memã arẽ. Nhy m kam me krãptĩ amipãnh Môjdjê mã amijarẽ nhy m amũ Metĩndjwỳnhmã me arẽ. Nhy m be, djã nãm Metĩndjwỳnh me'ômã Kritu jarẽ nhy m arỳm amũ

Abraãomã arê? Kati. Metĩndjwýnh pydji ne tu Abraão kuka kônh djan kum tãmdjwýbê Kritu jarê.

²¹ Metĩndjwýnh ne Abraãomã apýnh mýjja mex jarên kum tãmdjwýbê Kritukôt axwe kêt jarê. Djã ne kam amikabên jao aknon kam memã kum,

—Dja ga me Môjdjê kukràdjã man kôt ar amijo aba. Ba kam arým me amã axwe kêt jarê, ane? Kati. Dja me Môjdjê kukràdjã man kôt ar amijo ban arým te axwe kêt prãmje ne Metĩndjwýnhkôt tĩn ne ar ba kêt. Ne ren me Môjdjê kukràdjã'õ man kôt ar amijo ban ren kam axwe kêt ne ren kam Metĩndjwýnh kôt tĩn ne ar ba nhym Metĩndjwýnh ren kam memã kum,

—Dja ga me Môjdjê kukràdjã man kôt ar amijo aban kam ajaxwe kêt, ane.

²² Nhym be, kati. Me'õ ta te axwe kêt prãmje. Metĩndjwýnh ne pi'ôkkam me kunĩ kupãnhã memã axwe jarê. Mýj kadjy ne me kunĩmã axwe jarê? Bir, me kute tu amim Jeju Kritu markumrêx kadjy. Dja me tu amim markumrêx nhym Metĩndjwýnh arým memã axwe kêt jarê. Tãm ne amrêbê: me bakukãmãremã arênh pydji.

²³ Nhym be, amrêbê me bakukãmãre kute tu amim Kritu markumrêx kêtri ne me Môjdjê kukràdjãkôt ar amijo ba. Me ta te: katormã ar amijo ba. Me kute mrãmri ne mebê ijêkam me ta te: katormã amijo ba pyrãk. Gwaj badjwý te bakatormã ari amijo baba. Nhym kam tũmrãm me arým gwaj bamã Kritu'ã ajarê, gwaj arým tu amim markumrêx ne arým bakato. Bakaton arým gwaj ba ar baban bakĩnhkumrêx.

²⁴ Kam, Môjdjê kukràdjã ne kute me kra prĩre pumũnh djwýnh pyrãk. Me bakukãmãre ne me

kute me kra prĕre pyr k. Ne kam me om nh djw nh k t ar amijo ba, M jdj  kukr dj  k t ar amijo ba nhym meb  t :xi. Me kute aben dj '  k t amijo ba t mt  nhym kam t mr m ar m Kritu me' r b x. Gwaj baw r b x gwaj ar m tu amim markumr x nhym ar m tu gwaj bam  axwe k t jar .

²⁵ Gwaj ar m tu amim Kritu markumr x. Dj m kam gwaj baje akubyn M jdj  kukr dj ' r amijo ak x pr m? Kati. Ar m me abat nhkam dj m akubyn kute amipum nh djw nh pr m? Kati. Gwaj badjw  ne gwaj akubyn baje M jdj  kukr dj  mar pr m k t. Kritu ne gwaj tu amim markumr x.

Meb  Met ndjw nh kra'  ujar nh.

Dju r 1.12; R  8.14; Ep 1.5

²⁶ Ar akun  ne gar ar m ab  Met ndjw nh kra. Gar ar m tu amim Kritu markumr x ne ar m ab  Met ndjw nh kra.

²⁷ Me kute ng m  ar ajadj r kun ja, m j'  ne ng m  ar ajadj rja amijakre? Bir, Kritum  ne gar atypdji. '  ne amijakre. Gar kam ar m aje Kritu pyr k. Kritub  Met ndjw nh Kra. Ar gadjw  ne gar Kritu k t ab  Met ndjw nh kra.

²⁸ Dj m kam dja gar aj  aben m r jabej mem  kum, "Ib  idjaer", ane? N r, "Ib  me bajtemb  kregu", ane? N r, gar aj  aben m r jabej mem  kum,

–N m me ipa 'am  ba me kab nk t kajgo ari idj p nh t xo iban idjumar punu, ane? N r,

–Me kute ipa 'am nh k t ba arek mek t ar iban idjumar mex, ane? N r gar aj  aben m r jabej

memã kum, “Imy”, ane, nàr, “Ini”, ane? Djãm aje amim Kritu markam aje aben mỳr jabej ã abenmã anhỹro abamã? Kati. Ar aje amim Kritu markam ne ar akunĩ abeno anhõbikwan apydji:i.

²⁹ Ne, ar abê Kritu nhõbikwakam Metĩndjwỳnh arỳm ar ajo Abraão tàmdjwỳ. Kute ar anhingêt Abraõomã kabẽn pỳnh ne arẽnhja kunĩ ne ajte ar amãdjwỳ arẽ. Dja gar arỳm Abãm nhõ mỳjjao aminhõ. Metĩndjwỳnh nhõ mỳjjao aminhõ.

4

Metĩndjwỳnh gwaj bajo kra.

¹ Jakam ne ba ar amã arẽ, me abê Garaxakam me jamã arẽ, gar ama. Me kra prĩre ne me kute bãm nhõ nêkrêx kunĩo bamã te o ane. Prĩrekam kute o ba kêt rã'ã. Nãm me kute bãm nhõ àpênh kajgo pyræk ne kajgo: ne.

² Nhyam kam me omũnh djwỳnh me prĩre jamã mrãnh mex'ã karõn me omũnho ba nhyam me kam kôt amijo ba. Nãm me prĩre pumũnh djwỳnh meo ba: nhyam me arỳm abatàn ne. Nhyam me bãm kute õ akati jarẽnhja arỳm bõx nhyam kam me arỳm bãm nhõ nêkrêxo aminhõn o ba.

³ Gwaj badjwỳ Kritu bõx kêttri ne gwaj baje me prĩre pyræk. Gwaj baje me àpênh kajgo pyræk ne gwaj bakajgo: ar baba. Nhyam me kute gwaj bamã pykakam me kukràdjà jarẽnh gwaj ajbit maro baba. Kute mrãmri ne me prĩre pumũnh djwỳnh me prĩremã mrãnh mex'ã karõo ba nhyam me kute kôt amijo baja pyræk. Gwaj badjwỳ gwaj pykakam me kukràdjàkõtbit amijo baba.

⁴ Nhyam be, kam arỳm õ akati bõx nhyam Metĩndjwỳnh arỳm pykamã Kra jano nhyam me'õ

nire kurũm kato. Katon arỳm Mòjdjê kukràdjà man kòt ar amijo ba.

⁵ Mỳj kadjy ne Mòjdjê kukràdjà man kòt ar amijo ba? Bìr, kute gwaj bajaxweo pãnh kadjy. Gwaj te Mòjdjê kukràdjàkòtbit amijo baban mã bajaxwe:. Nhyim Kra arỳm gwaj bajaxweo pãnh nhyim kam Metĩndjwỳnh arỳm gwaj bajo kra. Ja kadjy ne Kra arỳm ruw ne Mòjdjê kukràdjà man kòt ar amijo ba.

⁶ Kute gwaj bajo krakam ne arỳm gwaj bamã Kra Karõ jano nhyim arỳm gwaj bakam nhỹn gwaj bajo ba. Gwaj kam amikam Karõ ma nhyim arỳm gwaj bakadjwỳnhbê Metĩndjwỳnhmã kum, “Aba, Aba”, anhỹro nhỹ. Me kabên djwỳnhkam kum, “Aba, Aba”, anhỹro nhỹ. Me bakabênkam ne Karõ ren arên ren kum, “Djũnwã, Djũnwã”, anhỹro nhỹ.

⁷ Ga, me kute me pa 'amỳnh nhyim me memã àpênh kajgo ar baja pumũ. Amrêbê ar gadjwỳ ne gar Mòjdjê kukràdjà man kòt amijo aba kajgo. Ne jakam arỳm Mòjdjê kukràdjà kòt amijo aba kêt. Kritu ar akadjy ty nhyim Metĩndjwỳnh kute ar ajo krakam. Dja ar amã õ mỳjja ngã gar o aba.

Me kute akubyn me kukràdjào ba prãm.

A Kò 11.3; Kor 2.16; Ped k 1.14

⁸ Be, ar abê me bajtem ne gar amrêbê ar aje Metĩndjwỳnhkumrêx mar kêt ne kòt amijo aba kêt. Apỳnh mỳjjao metĩndjwỳnh karõ nhìpêxjamã ne gar adjàpênh tỳx kajgoo aba. Djãm mrãmri ne kubê Metĩndjwỳnhkumrêx? Arkati. Gar o aban aje mrãmri ne me pa 'amỳnh nhyim me memã àpênh tỳx kajgoo ba ne te apòx prãmje ja pyræk.

⁹ Nhyim be, jakam ne gar arỳm aje Metĩndjwỳnhkumrêx mar. Djãm ar ga ne gar amim

mar? Kati. Ta kumrēx ne kute ar amarn arým ar amã amijo amirīt gar kam kôt arým amim maro aba. Arým ar aje Metĩndjwýnhkumrēx mar jakam mýkam ne aje akubyn me kum Metĩndjwýnh kĩnh kêtja kukràdjà marn kôt amijo aba prãm? Gar me kukràdjà kôt ar amijo aban te ajaxwe kêt prãmje. Kam ar arerekre. Me kukràdjà kajgo. Dja gar kôt ar amijo aban arým aje mrãmri ne me pa 'amýnh nhym me memã àpênh kajgo ba pyràk.

¹⁰ Ar aje mýjja kajgo kadjy adjàpênh tỳx prãmkam ne gar apýnh akati krãptĩkam me kukràdjà man arým abenmã kum,

—Akati ja dja gwaj 'ã bano tỳx ne Mòjdjê kukràdjà kôt bamex, anen ajte apýnh mytyrwý'ã abenmã kum,

—Mytyrwý ja dja gwaj 'ã bano tỳx ne me kukràdjà kôt bamex, anen ajte abenmã kum,

—Dja gwaj bàygogo djê pan ajte Mòjdjê kôt akati ja ma, anen ajte abenmã kum,

—Dja gwaj amex ja'ã bano tỳx ne Mòjdjê kukràdjà kôt bamex, ane. Dji:jàk. Djãm me kukràdjà kajgoja krãre got? Djãm ar aje ã amijo anhýrkam Metĩndjwýnh kute ar amã ajaxwe kêt jarênh gar kum amex got?

¹¹ Amrêbê ba me abê Garaxakam Kritu jarênh o iban idjapênh kume:x. Ar akam idjapênh kajgo gar aje Kritu mar kajgo karō ne ba ar ajã idjãpnhĩx ne axwe idjumar ne.

¹² Akmere, àpnhĩre ar, on ar ikudjwa. Ba ne ba ije ar apyràk. Djãm ba ne gar ijo ajkê, ba ar amã ikabên? Kati.

13 Nhym be, amrêbê ije ar amã Kritu'ã ujarênh ny jarênh kutewa. Kamã ne ba ikanên ar amã Kritu'ã ajarê gar ama.

14 Nãm itokry te ijo ba djãm kam ne gar amã ikurên ikanga? Kati. Nã gãm ar prĩne imar mex. Nã gãm ar ijo Metĩndjwýnh kadjy mrãnh djwýnh pyræk nàr ijo Kritu Jeju pyræk ne ar amã ikĩ:nh ne.

15 Ba ino kanê: gar te aje ikadjy ano kadjàr ne pãnh imã ano jadjàr ba ikanê kêt mã. Ba ne ba 'ã ar apumũn arým ar amã arê. Ar amã ikĩnh. Mýj ne gar arým jakam amijon?

16 Djãm ije katàt ar amã Metĩndjwýnh kabên jarênhkam gar arým ijo akurê djwýnh?

17 Be, wãkam me'õ ar kute amiwýr ar ajo akêxmã àpênh kume:xo ba. Djãm me kute ar ajo mex kadjy? Kati. Me kute ar abê ikurêmã. Dja me ar abê ikurê gar kam arým mekôt ar amijo aban arým me kukràdjà'ã ano týt ne ar o aba. Ja kadjy ne me ar abê ar ikurêo ba.

18 Ne ren me kute ar ajo mexmã àpênh kumex ne ren kam mrãmri mexkumrêx. Ar akam idjãmkam ne me ren ar ajo mexmã àpênh kumex ne ren ajbubê itým kamdjwý ren ar ajo mexmã àpênh kumex ne kam ren mrãmri mexkumrêx. Nhym be, kati. Me kute ar abê ikurê kadjy ne me àpênh kumex.

19 Ba ne ba imã ar ajabê:ê kute mrãmri ne me kum kra prĩre jabêja pyræk. Ije me'õ nire kra àkam umar punure pyræk ne ar akam idjumar punu:re. Me'õja amijo 'êx ne Kritu kupa'ã ar amã arê ba ar ama:ro iba. Nok gar ren kabên man Kritu kupa'ã amijo tẽ. Ga, me prĩre kute nã tikkrekam aminhipêxo baja pumũ. Nãm aminhipêxo ba:n

arým přine aminhipêx nhinomã kumě. Ar gadjwỳ. Dja gar přine Kritu kôt amexo amũ amikaměňho tē. Amikaměňho tē:n kam arým přine Kritu mexo amex. Tãm ne ba imã kĩnh. Nã bãm ar ama:ro iba.

²⁰ Ar awỳr ibôx prãm kam ne ba dja. Ne ba ren inhýtã ar awỳr bôx. Djã ne ba ren kam ar amã iběň tỳx? Kati. Kam ne ba ren ar amã iběň rerekbito ikaběň. Nhym be, kati. Amybỳm ne ba axwe ar akam idjumar ne.

Agaremě Xara'ã ujarěnh.

²¹ Dja gar jakam imã arě. Ar aje Môjdjě kukrãdjã marn kôt amijo aba prãmja mỳkam ne gar amikadjy kukrãdjã kunĩ mar kět?

²² Ba ar amã kukrãdjã jarě gar ama. Môjdjě ne kute 'ã pi'ók no'ókkam memã Abraão kra amãnhkrut'ã ajarě. Kra ja ne Abraão õ àpěnh kajgobě Agaremã kudji. Agare ne kubě me pardja. Nãm Abraãomã àpěnh kajgobit ar ban umar punure. Ő àpěnh kajgo jamã ne kra ja dji. Nhym be, prõ djwỳnhbě Xaramã ne kra djwỳnhja dji. Prõ ja ne kubě me pardja kět ne ta arek mekôt ar ban umar mex.

²³ Nhym kam Abraão ta ne Xara kute kum arěnhkôt me pardjajamã kra ja dji nhym kumrěx ruw. Nhym be prõ djwỳnhmã kute kra djwỳnh djirja ne Metĩndjwỳnh kaběnkôt. Metĩndjwỳnh ta kute kum kra jarěnh kôt ne Abraão arým prõbě Xaramã kudji. Kute kum, “Dja akra'õ amirĩt”, anhỳr kôt arým kum kudji. Xara kubě me pardja kět ne ta arek mekôt ar ban umar mexkumrěxjamã ne kudji nhym kam ruw.

24 Mỳkam ne ba ar amã ar nire abenkôt kra rwỳkja'ã ajarẽ? Mỳj'ã ne ar nireja amijakre? Bir, ar amãnhkrut Metĩndjwỳnh kabẽn amãnhkrut'ã amijakre.

Ba ar amã kabẽn jarẽ gar ama. Metĩndjwỳnh kute Abraãomã kabẽn jarẽnhkam ne kum Kritu jarẽ. Kritu'ã ne Xara amijakre. Nhym be, Mỏjdjê kukràdjà'ã ne Agare amijakre. Be, kabẽn amãnhkrut ne ja. 'Ã ne ar nire amãnhkrut amijakre. Metĩndjwỳnh ne krãnhbê Xinajkam Mỏjdjêmã me kukràdjàja jarẽ. Me kukràdjàja kôt ne me àpênh tỳx kajgobit ar ban te axwe kêt prãmje. Krãnhbê Xinaj'ã ne Agare amijakre. Agare ne kubê me pardja ne Abraãomã àpênh tỳx kajgobit ar ba.

25 Agare'ã ne krãnhbê Xinaj amijakre. Pykabê Arabijkam ne krãnhbê Xinaj. Nhym kam Xinaj'ã ne pykakam krĩraxbê Djeruxarẽja amijakre. Djeruxarẽ jakam me ar ba ne me kute Mỏjdjê kukràdjàbit mar. Me kute Mỏjdjê kukràdjàbit mar ne me àpênh tỳx kajgobit ar ban te axwe kêt prãmje.

26 Nhym be, me kute amim Kritu mar ne me kàjkwakam Djeruxarẽkam ar ba. Me ja ne me kute Mỏjdjê kukràdjà marn kute kôt amijo baja kangan Kritubit kôt ar amijo ba. Kôt ar amijo ban kubê me pardja kêt ne ta arỳm arek mekôt ar ban umar mex ne. Kàjkwakam Djeruxarẽ ne kute me banã pyrak.

27 Ga, Metĩndjwỳnh amrêbê: kute me bakukãmãremã kabẽn jarẽnh nhym me arỳm kute 'ã pi'òk no'òkja pumũ. Nãm Metĩndjwỳnh tu krĩraxbê Djeruxarẽmã kabẽn jarẽ. Nãm tu kum,
 “Ga te akra prãmje ne akra kêt kumrẽxja on akĩnh.
 Aje akra à mar kêtja on tu adjàmra tỳx kaba.

Djãm mrãmri akra kêt ne ar abamã, amjên kute akangakam akra kêt ne ar abamã? Kati. Dja me arým mjênja te akuràm kra krãptĩ ga dja ga akra krãptĩo me akrenh mex ne.”

Nãm ã kàjkwakam krĩraxbê Djeruxarëjamã ane. Ga, kàjkwakam krĩraxbê Djeruxarë kute mrãmri ne gwaj bakunĩ nã pyrækja pumũ. Arým gwaj bakrãptĩn tu amim Kritu markumrëx nhym Metĩndjwýnh arým tu gwaj bamã axwe kêt jarë.

²⁸ Ga, Metĩndjwýnh kute Abraãomã kum, “Dja akra amirĩt”, anhÿrja pumũ. Nhym kam kute kum arënh kôt arým Idjak kato. Ar gadjwý ne gar aje Idjak pyræk. Mÿkam? Bir, Metĩndjwýnh ne ar amã,

—Dja gar tu amim Kritu markumrëx. Ba kam arým ar amã axwe kêt jarën arým ar ajo ikra, ane. Gar kam arým tu amim markumrëx nhym kute ar amã arënh kôt arým ar ajo kra. Kute Abraãomã arënh kôt ne arým kra Idjak kato. Ar gadjwý kute ar amã arënh kôt ne arým ar amã axwe kêt jarën arým ar ajo kra.

²⁹ Nhym be, amrëbê: Imaêr kum Idjak kurêo ba. Metĩndjwýnh Karõ kabën kôt ne Abraão arým kra Idjak dji nhym katon ar ba nhym Imaêr kum kurêo ba. Abraão ta ne Imaêr dji nhym arým kum kamybê Idjak kurêo ba. Nãm ã akati jakam me kum gwaj bakurêo ane. Me kute amim,

—Dja ba Mõjdjê kukràdjà man kôt ar amijo iban arým ijaxwe kêt, anhÿro baja. Me ja ne me kum gwaj bakurê. Kum gwaj baje amim Kritu marja kurêo ba. Gwaj baje amim Kritu mar ne gwaj amim,

—Dja ba tu amim Kritu markumrëx nhym Metĩndjwýnh arým imã ijaxwe kêt jarë, anhÿro

baba. Gwaj anhỹro baba nhym me arým kum gwaj bakurêo ba.

³⁰ Nhym kam mỳj ne amrêbê: me bakukãmãre arê nhym me'ã pi'ôk no'ôk ne? Bir, Xarabê me pardja kêtja ne Agare'ã Abraãomã kabên ne kum, “Djãm gu banhõ àpênh kajgo kraja kute ikra kôt anhõ mỳjjao aminhõmã? Amỳrbê kute o aminhõmã?

Kati. Ikrabit dja anhõ mỳjjao aminhõ. On ikra nêje bõm Agaremẽ kra ar amẽ.”

Nãm ã Xara Abraãomã ane.

³¹ Ar tãm 'ã dja gwaj amijakren amima. Me kute amim,

—Ba Mõjdjê kukràdjà man kôt ar amijo iban ijaxwe kêt, anhỹrja ne me te axwe kêt prãmje. Nãm me me pardja kra'ã amijakre ne àpênh kajgo ar ba. Dja me Metĩndjwỳnh nhõ mỳjjao aminhõ kêt ne axwe rã'ã. Nhym be, gwaj ba ne gwaj tu amim Kritu markumrêx nhym Metĩndjwỳnh arým tu gwaj bamã axwe kêt jarê gwaj arým kum bajaxwe kêt. Gwaj ba ne gwaj me pardja kêt kra'ã amijakre ne kam Metĩndjwỳnh nhõ mỳjjao aminhõ.

5

Pykakam me kute kukràdjà kajgo kôt amijo ba nêje me akre.

Rô 3.21; Kor 2.20

¹ Gwaj ba: arek mekôt ar baban badjumar mex kadjy ne Kritu arým gwaj bapytà. Ga, mryti kute jênh pytĩ tur ne kute o baja pumũ. Gwaj badjwỳ amrêbê: gwaj pykakam me kukràdjà kôt badjapênh tỳx kajgobit ar baba. Kam ne gwaj badjumar punu:re. Nhym Kritu arým gwaj bapytà

gwaj arým me kukràdjà kôt badjàpênh kêt. Gwaj ba ne gwaj Kritukôt arek ar baban badjumar mex. Arým Kritu kôt badjumar mexkam kwārīk wānh Mōjdjê kukràdjà'yr amijo akēx kêt ne kôt amijo aba kêt. Dja ga kôt ar amijo aban arým akaprī:re kute mrāmri ne mry jênh pytīkam kaprī pyrāk. Gê me te: kukràdjà'ã ar amã karō gar arek mebê dja. Kritu kôt dja gar adjām tỳx.

² Ba ibê Paur ne ba me abê Garaxamã arê. Godja gar aje memã kum,

—Ajrã. Mōjdjê kukràdjà kôt imy nhinhu kà krãta. Dja ba kôt ijaxwe kêt, anhÿr jabej nhym me amy kà nhinhu krãta gar kam arým aje Kritu mar kajgo.

³ Ba aje mrāmri me kunĩmã arēnhkumrêx. Metĩndjwÿnh ne arým me my kà rēnhjamã kute prĩne Mōjdjê kukràdjà kunĩ kôt amijo bamã memã arê.

⁴ Ar ajō ar aje amim,

—Ba Mōjdjê kukràdjà man kôt ar amijo iban arým ijaxwe kêt, anhÿr. Ar aje amim anhÿrkam aje Kritu mar kajgo. Nhym kam Metĩndjwÿnh kum ar akaprī kêt ne arým ar amã axwe jarê. Ar ga ne gar Kritu bê amijo akēx.

⁵ Nhym be, gwaj ba ne gwaj arým tu amim Kritu markumrêx. Nhym kam Metĩndjwÿnh arým Karō kôt gwaj bajo mex. Dja Karō gwaj bajo ban arým gwaj bajo mex gwaj kam bakunĩ bajaxwe kêt. Tãm ne gwaj tu amiwÿr kamnhĩxkumrêx.

⁶ Be, Kritu kôt gwaj baje amijo babakam djãm Metĩndjwÿnh kute gwaj bamy kà rēnh mar? Nār djãm kute gwaj bamy kà tã mar? Kati. Ja ne kum kajgokumrêx. Nhym be, gwaj baje tu amim Kritu markumrêxkam. Kambit ne gwaj mrāmri kum

bakajgo kêt-kumrêx ne kum bajaxwe kêt. Ne baje tu amim markumrêxkam arÿm bamã me abêkumrêx.

⁷ Amrêbê ne gar aje mrãmri ne me rer djwÿnh prôt mex pyræk. Ne katàt Kritu kôt ar amijo aban 'ã adjukanga kêt-kumrêx. Mÿj me'õ ne ar abê aptà? Gar kabên katàt man kôt ar amijo aba nhym ar abê aptà?

⁸ Djãm Metïndjwÿnh kute amiwÿr ar ajwÿr djwÿnh ta ne ar abê aptà? Djãm ta ne Môjdjê kukràdjà'ã ar amã karõn o ar abê aptà? Kati. Atemã me'õ.

⁹ Ga, me kute djwÿkam igot djà kryre rênhja pumũ. Nhym kam arÿm djwÿ djôm mẽ amrà. Ar gadjwÿ ne me ngrêre ar amã 'ã karõo dja. Dja me arek ar amã 'ã karõo dja: nhym me kabên ar anhĩ kunĩ mẽ amrà arÿm me'ÿr ar ajo akêx gar arÿm mekôt ar amijo aba.

¹⁰ Nhym be, arÿm ne gar aje ikabên ja markam ba tu amim ar akamnhĩxkumrêx ne amim,

—Kati. Jakam dja ar ikabên man Kritu kôtbit amijo ba, ane. Nhym be, me'õ ja kute Môjdjê kukràdjà'ã ar amã karõn ar amã kaprĩ jadjàrja gêdja Metïndjwÿnh arÿm kum axwe pãnh jarê.

¹¹ Nhym me we ar amã,

—Paurdjwÿ ne me my kà rênh'ã memã àpnêho ba, anhÿro ba. Djãm mrãmri me kabên? Kati. Ba ne ba kàj bê memã kum,

—Kritu ne pïte'ykam ty. Dja ga me tu amim markumrêx, nhym Metïndjwÿnh arÿm tu me amã axwe kêt jarê ga me kum ajaxwe kêt, anhÿro iba. Ne ba ren iby ajte memã kum,

—Gê me me amy kà rênh gê kam arÿm Metïndjwÿnh me amã axwe kêt jarê, anhÿro iba

nhym ren me kum ikurê kêt. Nhym be, kati. Nã bãm memã kum,

—Kritu ne pîte'ykam ty. Dja ga me tu amim markumrêx nhym Metĩndjwỳnh arỳm tu me amã axwe kêt jarê, anhỹro iba. Jabit ne ba memã arê. Ne kam ije me my kà rênh'ã memã karõ kêt. Kam ne me arỳm ijo bikênho ba.

¹² Be, me kute ar amy kà rênh'ã ar amã karõn ar amã kaprĩ jadjarja ren ta ã amijo bikênho ane.

*Me kute Metĩndjwỳnh Karõ mar'ã memã karõ.
Idja 13.3; Ped k 1.22; Dju k 3.11*

¹³ Kam, akmere àpnhĩre ar, djãm ar aje Mõjdjê kukràdjà marn kôt amijo aban ar akaprĩmã ne Metĩndjwỳnh amiwỳr ar ajuw ne ar ajo ba? Kati. Ar adjumar mex ne arek mekôt ar abamã. Ja kadjy ne Metĩndjwỳnh amiwỳr ar ajo akêx. Ar aje Mõjdjê kukràdjà kôt amijo aba kêt ne arek mekôt ar abakam djãm kam arỳm tu ajaxwemã? Djãm aje amidjwỳnhbito kĩnh kadjy tu ajaxwemã? Kati. Kwãrĩk wãnh ajaxwe kêt. Arỳm aje Mõjdjê kukràdjà mar kêt ne arek mekôt ar abakam dja gar amã aben jabên abenmã apê.

¹⁴ Mỳkam? Bir, Metĩndjwỳnh ne memã kum, “Me amã amibu'ã me ja jabê. Kute mrãmri ne ga me amã amijabêja pyràk dja ga me ã amã amibu'ã me ja jabêo ane”, ane.

Dja gar Metĩndjwỳnh kabênja pydjibit man kôt ar amijo aban arỳm Mõjdjê kukràdjà kunĩ man kôt amijo aba. Mrãmri ar amã me abêkam ne gar tu Metĩndjwỳnhmã amexkumrêx.

¹⁵ Nàr kon dja gar amã aben kurêo aba mỳj dja kam akute? Ga, ropre kute aben kamjãnh ne kute

abeno apêxo baja pumũ. Ar gadjwỳ dja gar amã aben kurê tãmtã ĩ arỳm aben bê akunĩ ajmà.

¹⁶ Gwaj ba, bamã amidjwỳnhbito kĩnh prãm ne kôt arỳm bajaxwe prãm. Nhym be, dja gar amim Metĩndjwỳnh Karõ man mã kôt ar amijo aban kam arỳm kôt ajmã akute kêt ne katàt amijo aba.

¹⁷ Djãm ar ga ne gar Metĩndjwỳnhmã ajaxwe kêt? Kati. Gwaj ba ne gwaj bajaxwe prãm ne amim, “Ba amidjwỳnhbito kĩnh”, anhỹro baba. Nhym kam Metĩndjwỳnh Karõ mã gwaj bamã,

–Kati. Kwãrĩk wãnh, anen ã akubyn gwaj banêo ane. Karõ mã akubyn gwaj banê gwaj ba bajaxwemã mã amim, “Ba amidjwỳnhbito kĩnh”, anhỹro baba. Gwaj mã bakabêno Metĩndjwỳnh Karõ japanho baba. Nhym ta mã akubyn gwaj banêo ba. Kam ar ga ne gar te ga: ajaxwe kêt prãmje.

¹⁸ Nhym be, ar ga dja gar amim Metĩndjwỳnh Karõ man mã kôt ar amijo aba nhym kam ta arỳm katàt ar ajo ba. Dja gar amim Karõ maro aba:n arỳm amã Môjdjê kukràdjà maro aba prãm kêtukumrẽx.

Me kute amidjwỳnhbito kĩnh prãmkam apỹnh axwe djari 'ã ujarẽnh ne ja.

¹⁹ Me kute amidjwỳnhbito kĩnh prãmkam ne me apỹnh mỳjjao ban kôt axwe. Me kute apỹnh mỳjjao baja ne me kunĩ kute mar.

Nãm me mebê prõo akĩ, mjêno akĩ.

Ne ajte ari prõ, mjên kupa'ã kurẽ ba.

Ne ajte kute abenbê me kupêno amijo àpnuo ba.

Ne ajte amijo àpnu me:x ne.

Me kute amidjwỳnho kĩnh prãm kam kute mỳjjao ba ne ja.

²⁰ Ne ajte mỳjjao metĩndjwỳnh karõ nhipêxmã amijarẽnho ba.

Ne ajte ta apỳnh mỳjja maro amiptàn arỳm amijo wajangao ba.

Ne ajte kum me kurêo ba.

Ne ajte axikôt kabẽn kêt ne abenã kabẽn ba.

Ne ajte me õ mỳjja pro'ã ngyrk ba.

Ne ajte kute amijã ngyrk nê kêt ne tu ngyrk ba.

Ne ajte kute amidjwỳnhbit markam amijo rax pytaro ba.

Ne ajte kute amiwỳr meo akêx prãmje aben bê me kurêo ba.

Ne ajte apỳnh mỳj kukràdjàja'ã no tỳx ne kam mỳr jabej apỳnh me kwỳ djari kôt bikprõnh ba.

Me kute amidjwỳnhbito kĩnh prãm kam kute mỳjjao ba ne ja.

²¹ Ne ajte te kute me uràk prãmje ngyrk ba.

Ne ajte aben paro ba.

Ne ajte kadjwati kangôkam* bibãnh ba.

Ne ajte apỳnh mỳjja punukam aben tỳx jabejo ba.

Be, apỳnh mỳjja kute ja pyràk rã'ã. Me kute amidjwỳnhbito kĩnh prãm kam kute mỳjjao ba ne ja. Dja Metĩndjwỳnh ã õ me ja kunõ ba. Djãm kam kute me jao bamã? Me kute mỳjja jao ba, djãm kute meo bamã? Kati. Dja me ja wãnh me biknor tokry djakam akuno. Tãm ne ba amrêbê ar amã arẽn ajte jakam ar amã arê.

* **5:21** Mỳjja me kute o kôm ne kôt bibãnh kunĩja, kadjwati kangômê uba kangômê, mỳjja kangô kunĩ ne me kum kadjwati kangô jarê.

Metĩndjwỳnh Karõ kute meo bakam me kute amijo ba mex.

²² Nhym be, dja Metĩndjwỳnh Karõ ta ar ajo ba. Gar arỳm ô'ã amã me abê.

Ne ajte akĩnhtire.

Ne ajte adjumar mex.

Ne ajte memã ano kator kêt ne amijamãr 'iry.

Dja Karõ ta ar ajo ba gar ajte ô'ã memã aprĩ.

Ne ajte anhõdjành.

Ne ajte katàt Metĩndjwỳnh kabẽn man kôt ar amijo aban 'ã adjukanga kêt.

²³ Ne ajte akabôt katin ar aba.

Ne ajte amijaxwe kêt kadjy amijãno dja.

Dja Karõ ta ar ajo ba gar arỳm ã amijo anen kam Metĩndjwỳnh kôt amijo aba mexkumrẽx nhym arỳm ar akam kĩnhkumrẽx ne ar amã ar akatàtkumrẽx jarẽ.

²⁴ Kritu kute gwaj bajo aminhõkam gwaj arỳm bamã bajaxwe prãm kêt. Baje amidjwỳnhbito kĩnh kadjy bajaxwe prãm kêt. Baje mebê me kupênh prãm kêt ne bamã mỳjja punu prãm kêt. Baje mrãmri ne Kritumẽ ro'ã aktã banhikra, baparmo i'êk pyràk. Gwaj ã amimaro ane.

²⁵ Mrãmri Karõ kute gwaj bajo ba jabej gwaj mã Karõ man prĩne kôt amijo baba mex.

²⁶ Kwãrĩk wãnh gwaj bakajgokam arĩk amijo badjãmra ar baba kêt. Dja gwaj amijo badjãmra ar baba:n arỳm abenmã aben kurê'uko baba. Ne aben rax mỳr jabej aben kam bangryko baba.

6

Me kum me kunĩ kaprĩ'ã kute memã karõ.

¹ Akmere àpnhĩre ar, godja me'õ arým axwe nhym me arým kute kôt omũnh jabej. Ar ga aje amim Metĩndjwýnh Karõ maro abaja dja gar me'õmã aprĩren akubyn Metĩndjwýnh'ýr o akêx. Ne amiman amim,

—Ý, watĩre. Nok ba ren akati 'õkam Metĩndjwýnh maro aknon ren ã kudjwa ijaxweo anhýr jabej, ane. Dja gar ã amimaro anen ajaxwe nêje amijãno djan arým me'õjamã aprĩren akubyn 'ýr o akêx jabej.

² Ga, me kute jênh pytĩo baja pumũ. Nhym me arým 'ýr bõx ne arým kum kaprĩn kôt o kangõ. Ar gadjwý dja gar aben maro aba nhym me'õ amikam kaprĩre. Ar amã kaprĩn kum kaprĩ kwý ngri. Dja gar ã anen arým aje Kritu kukràdjã marn kôt amijo aba mexkumrêx.

³ Nhym be, godja ajõ katàt aje amijo aba kêtka mã amim,

—Djãm ba ijaxwe? Kati. Ijaxwe'õ kêtka mãmri, 'itýx, anhýro aba jabej. Djãm mãmri ne akabên? Kati. Ga ne ga amim ajêx ne aminoo abiknoro aba.

⁴ Ar akunĩ apýnh anhĩ djãri gar mãmri katàt aje amijo aba jabej ga: amikabi. Ne kam mãmri katàt aje amijo abakam ga amikam akĩnh. Nhym be, djã ne aje amim,

—Ba ne ba ije katàt amijo ibao tãmwã jakrenh, anhýro abakam djãm mãmri akatàt? Kati. Ar aje ã amim anhýro abakam akatàt kêtka mãmri.

⁵ Nhym be, ar akunĩ apýnh anhĩ djãri dja gar goja mãmri akatàtkumrêx jabej katàt amijo aba.

⁶ Be, dja Metĩndjwýnh kabên jarênh djwýnh ar amã kabên jarênh ku'ê, ar amikutã kum ar anhõ

mỳjja mex kwỳ ngã. Kum angã gê ar akôt o amikĩnh.

⁷ Djãm me kute Metĩndjwỳnh'ã abenmã kum,

—Djãm mrãmri dja Metĩndjwỳnh memã axwe pãnh jarẽ? Kati. Kabẽn kajgo. Me àkĩnhĩkam pãnh kêt. Me 'êxnhĩkam pãnh kêt. Me axwe kunĩkam pãnh kêt, anhỳr? Djãm me kute anhỳrkam mrãmri me kabẽnkumrẽx? Kati. Kwãrĩk wãnh amim ajêx ne aminoo abiknor kêt. Ga, mrỳnhĩ 'y, akrô 'y, akaôk 'y, 'ê 'ôdjwỳ 'yja pumũ. Djã ne ren me 'y ja kren ren kôt djwỳ mex jamỳ? Kati. Me kute 'y mexbit krekam kute kôt djwỳ mex jamỳnh.

⁸ Gwaj badjwỳ. Godja gwaj amidjwỳnhbito kĩnh kadjy bajaxwe jabej, badjàkĩnhĩo baba jabej, bak-abẽn punuo baba jabej. Metĩndjwỳnh dja pãnh gwaj bamã mỳjja punu ngã gwaj arỳm bakaprĩ:re. Dja gwaj baje me kute mrỳnhĩ 'y kren arỳm kaprĩ pyræk. Nàr, godja gwaj amim Metĩndjwỳnh Karõ man katàt kôt ar amijo baba, Metĩndjwỳnh Karõ dja arỳm gwaj bamã o pãnh. Pãnh dja gwaj arỳm kôt batĩn ne ar baba rã'ã: rã'ã ne.

⁹ Kam dja gar adjukaprĩn katàt aje amijo aba'ã adjukanga kêt. Dja gar ã anen ĩ arỳm amim akĩnh djã byn akĩnhkumrẽx. Kute mrãmri ne me kute bàygogo djê parkam me kĩnh pyræk.

¹⁰ Pykakam mekôt ar abari dja gar amã me kunĩ kaprĩ. Dja gar me kute amim Jeju marja kumrẽx aman amã me kaprĩn kam amã me kunĩ kaprĩ.

Metĩndjwỳnh kute meo nykambit kĩnh.

¹¹ Ga, ba inhi Krakam ije ar amã pi'ôk no'ôkkam ije no'ôk rũnhja pumũ.

12 Me ar amy kà rênh'ã ar amã àpnênho ba. Dja gar me kabên kôt ar amy kà rê nhym amũ me ja arým me'ã abenmã kum,

—Be, me Môjdjê kukràdjà'ã no tỳxkumrêx. Me mexkumrêx, ane. Ja kadjy ne me ar amy kà rênh'ã ar amã apnê. Ne ren 'ã ar amã àpnênh kêt nhym ren me 'ã kum me kurêo ba. Nhym ren me Kritu pĩte'ykam jêtbit'ã ar amã ajarê nhym ren me 'ã kum me kurêo ba. Nhym be, kati. Nãm me ar amy kà rênh'ã ar amã àpnênho ba nhym me arým kum me kĩnh.

13 Djãm me arým my kà rênhkam kute mrãmri Môjdjê kukràdjà marn kôt amijo bakumrêx? Kati. Ne kam mỳj kadjy ne me ar amy kà rênh'ã ar amã apnê? Bir, dja me amiwỳr ar ajo akêx ne 'ã amidjwỳnhbito amran memã kum,

—Be, arým ar me bakukràdjà kôt ba mexkumrêx. Ba ne ba 'ỳr aro akêx, ane. Ja kadjy ne me ar amy kà rênh'ã ar amã àpnênho ba.

14 Nhym be, djã ne ba ba: amijo idjãmra prãm? Kati. Bẽnjadjwỳr djwỳnhbê Jeju Kritu ne ba o idjãmra prãm. Kute gwaj bajaxweo pãnh kadjy ne arým pĩte'ykam ty. Tãm ne ba o amra. Pĩte'ykam tykkam Metĩndjwỳnh arým imã ijaxwe kêt jarê. Kam, me kum Metĩndjwỳnh kĩnh kêt kukràdjàja ba arým kanga. Ga, me arým tykkam kum mỳjja kĩnh kêtja pumũ. Badjwỳ imã me kukràdjà kĩnh kêt. Me kum Metĩndjwỳnh kĩnh kêt kukràdjàja imã kĩnh kêt. Ba Kritumê ro'ã pĩte'ykam arým ityk pyræk ne imã me kukràdjà kĩnh kêt.

15 Be, arým gwaj baje tu amim Jeju Kritu markam djãm Metĩndjwỳnh kute gwaj bamy kà rênh mar nàr djãm kute gwaj bamy kà tã mar?

Kati. Mỳjja ja ne arỳm kum kajgokumrẽx. Nhym be, gwaj arỳm tu amim markumrẽx nhym arỳm gwaj bajo ny ne. Tãm ne Metĩndjwỳnh kute markumrẽx.

¹⁶ Me kute ikukràdjà jakôt amijo baja gê Metĩndjwỳnh kum me kaprĩ gê me umar mexkumrẽx. Metĩndjwỳnh nhõ mebê idjaerkumrẽxja gê kum me kaprĩ gê me umar mexkumrẽx.

¹⁷ Jakam dja gar aminhijukri amidjan ajõ ajte imã ikaprĩ jadjàr kêt. Kute mrãmri ne me kute Bẽnjadwỳr djwỳnh Jejuo bikẽnhkam apỳnh kà rã kumex pyràk ne ikà rã kumex. Jujukôt ne ba ikà rã kumex. Kam kwãrĩk wãnh ajte imã ikaprĩ jadjàr kêt.

¹⁸ Gê Bẽnjadwỳr djwỳnhbê Jeju tu kum ar akaprĩ.* Tãm ne ja.

* **6:18** Djãm ar ga ne gar adjukaprĩ nhym pãnh arỳm kum ar akaprĩ Kati. Ta ne tu kum ar akaprĩkumrẽx.

Metĩndjwỳnh Kute Memã Kabẽn Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files
dated 29 Jan 2022

385317df-3c6a-53ac-81db-0815750ed560